



Vischnaunca
Tujetsch

Protocol dalla 10. radunonza da vischnaunca

dils 9 d'avrel 2025

allas 19.00 uras ella Sala Cristalla a Sedrun

**Protocol nr. 10 dalla radunonza da vischnaunca dils 9 d'avrel 2025
allas 19.00 uras entochen allas 20.40 uras
ella Sala Cristalla a Sedrun**

Presidi: Martin Cavegn (president communal)

Protocollista: Larissa Berther

Dumbravuschs: Silvio Schmid e Nicole Giossi

Presents: 23

Perstgisas: Reto Schmid, Maurin Cavegn, Simona Giossi

Tractandas

1. Beinvegni e constataziuns
2. Protocol dalla radunonza da vischnaunca nr. 9 dils 11 da december 2024
3. Approbaziun dil credit supplementar pertuccont la sanaziun Via Milar a Rueras
4. Orientaziuns
5. Varia

1. Tractanda Avertura e constatziuns

Il president communal fa in cordial beinvegni a tuttas convischinas e tuts convischins sco era al president dalla cumissiun da gestiun tier la dieschavla radunonza da vischnaunca dil trienni 2023/2026. Ils ulteriurs commembers dalla cumissiun da gestiun, Reto Schmid e Maurin Cavegn, han schau seperstgisar per questa sera. Medemamein ha Simona Giossi, menadra dall'administraziun e protocollista, schau seperstgisar per questa sera. Il president communal declara che da niev vegni il messadi buca pli tarmess directamein ellas casadas, mobein mo in'invitaziun cullas tractandas. Pils quals che veglien vinavon leger il messadi detti ei duas pusseivladads. U ch'ins sappi retrer il messadi fisic tier l'administraziun communal, ni ch'ins sappi cargar giu il messadi silla pagina d'internet dalla Vischnaunca Tujetsch. Il president communal constatescha che la convocaziun seigi succedida tenor la lescha ed el fa menziun che Nicole Giossi e Silvio Schmid ageschien sco dumbravuschs per questa sera.

2. Tractanda Protocol nr. 9 dils 11 da december 2024

Suenter ch'il protocol nr. 9 dils 11 da december 2024 ei vegnius publicaus en nies feagl official La Tuatschina nr. 25 dils 20 da december 2024 ein neginas protestas vegnidadas inoltradas el decuors da 30 dis dapi la publicaziun. Il protocol ei cheutras approbaus.

3. Tractanda Approbaziun dil credit supplementar pertuccont la sanaziun Via Milar a Rueras

Il president communal declara als convischins la procedura tier sanaziuns da vias. El declara co la repartiziun dil cuosts tier sanaziuns da vias succeda e fa menziun che la suprastonza communal possedi ina gliesta cullas vias che stoppien aunc vegnir sanadas. La cumpart dall'interessenza publica e la cumpart dalla vischnaunca dependi dalla sort da via che duei vegnir sanada. Ins differenzieschi denter vias da quartier, vias da rimnada, e vias senza colligiazion, aschinumnadas stumpas. Ei seigi impurtont da saver che la grondezia dalla surfatscha dallas parcellas el perimeter hagi ina directa correlaziun cull'altezia dils cuosts che stoppien vegnir purtai dils possessurs da terren.

In effect lateral dalla pandemia da corona seigi stau la carischia. Las firmas hagian stuiu alzar ils prezis e dapi lu seigien ils prezis buca pli sesbassai.

Pil mument secattien ins all'entschatta dalla procedura da perimeter en connex culla sanaziun dalla Via Milar a Rueras. Il president communal declara che la sanaziun da quella via seigi sulettamein pusseivla sch'els convischins e las convischinas concedien questa sera il credit supplementar.

Plinavon regorda el ils presents ch'ei existi ina disposiziun dil cantun, la quala pretendi che las auas da meteo vegnien spartidas dallas auas tschuffas tenor il GPAA.

Il president communal surdat il plaid al gerau GM. Lez declara daco ch'ei basegni in credit supplementar da frs. 400'000.00 per la sanaziun dalla Via Milar.

Avon dus onns hagi in biro d'inschignier fatg ina calculaziun dils cuosts ed hagi priu la Via Dentervitgs sco exempel. Quella calculaziun hagi denton giu en sbagls e cun rimnar e leger atras las offertas hagian ins stuiu constatar ch'ei basegni in credit supplementar per la sanaziun dalla Via Milar. Pigl avegnir seigi ei impurtont d'entscheiver in, dus onns avon cullas lavurs da calculaziun per ch'ins sappi evitar situaziuns sco quella.

Plinavon declara gerau GM davart il project che vegni realisau aunc uonn e nua ch'ei vegni menau naven las auas dil Dutg Flurin e dil Dutg da Rueras. Ils davos onns han inundaziuns da quels dutgs menau tier donns. Ina idea fuss d'engrondir ils bischels existents. L'incumbensa ei da menar giu las auas el Rein e d'evitar che quell'aua vegni en contact cull'aua tschuffa dalla canalisaziun.

Debatta d'entrada

Tier la debatta d'entrada han 5 convischins priu il plaid:

Convischin 1 havevi oriundamein giu plascher che la Via Milar duei vegnir sanada. Cura ch'el ha denton intervegniu ch'ils cuosts oriunds s'augmentien per taluisa, hagi el midau meini. El fa la proposta da buca conceder in credit supplementar per la sanaziun dalla Via Milar.

Convischin 2 damonda sco tgei sort da via che la Via Milar seigi vegnida risguardada. Per el seigi il campadi culla piazza da giugs ina piazza publica – ergo stuess la Via Milar vegnir risguardada sco via da rimnada, tgei che havess in'influenza silla repartiziun dils cuosts.

Convischin 3 fa quitaus pervia dils cuosts. Tier la Via Dentervitgs eri la cumpart dall'interessenza publica 60-80% dils cuosts totals. El sedamonda daco che quei vegni tractau auter tier la Via Milar. Plinavon discusseglia el da far ina part dalla via cun crappa da sulada. Quei fetschi gronda canera e quei drovi ei buc.

Il president communal pren posiziun e declara che sanaziuns da vias fussien gnanc pusseivlas sche la vischnaunca stuess surprender senza tut ils cuosts. Tenor la nova lescha hagi la suprastanza communal la cumpetenza da decider davart la clav dalla repartiziun dils cuosts. En quei connex vegni ei adina mirau sin tgei via ch'ils possessurs da terren hagian access tier lur parcelas. Ina part dalla Via dalla Fontauna seigi avon onns vegnida embellida cun crappa

da sulada. Ils convischins da Rueras hagian oz la caschun da decider, schebein ina part dalla Via Milar duei vegnir fatga cun crappa da sulada ni buc.

Gerau GM fa ina remarca supplementara e declara als convischins ch'ins savessi teoreticamein far sulettamein in catram silla Via Milar. Quels cuosts vegnessen allura surprì dalla vischnaunca, mo tenor la disposiziun dil cantun stoppien las auas tuttina vegnir spartidas. Quei havess per consequenza che la via stuess puspei vegnir cavada si e fatga empaglia.

Convischin 4 sedamonda co ins hagi saviu calcular aschi falliu ils cuosts da sanaziun. Tenor el savess la vischnaunca surprender ina pli gronda cumpart dils cuosts. Dil reminent sedamonda el daco che l'energia alpina e l'Aua Cristalla hagian mo da surprender ina mudesta cumpart dils cuosts. Tenor el seigi quei ina beffa enviers ils proprietaris da terren. Sco davos damonda el daco ch'ins fetschi nuot vid la via che meini Giu Milà.

Il president communal pren il plaid e declara che la suprastanza communal eri medemamein surstada dalla schliata calculaziun dils cuosts. El quen d'investiziun eran frs. 400'000.00 previ. La cefras ein vegnidas surpridas tenor la calculaziun digl inschignier. Sin fundament dalla carischia e sin fundament dalla nova situaziun sin la fiera da baghegiar ein ils cuosts carschi considerablamein. Igl ei deplorablamein era buca da quintar ch'ils cuosts vegnien a sereducir ils proxims onns – gest il cuntrari ei da quintar.

GM completescha ch'ei seigi en puncto electricitad buca previu da midar ora lingias ed en caussa Aua Cristalla seigi ei sil pli da midar ora ina ni l'otra siara (Schieber). Ils cuosts mussai ora ein buc ina cumpart dils cuosts totals, numnadamein ils cuosts totals per las lingias d'electricitad ni dall'aua. Q.v.d. ch'ils possessurs han da separticipar cun negina cumpart vid quels cuosts.

Vinavon declara il gerau che la via che meini Giu Milà seigi atgnamein e tenor il plan directiv ina senda e buc ina via. Ins sa dir ch'ei setracti cheu d'ina via da fretg. Duvrar quella ufficialmein sco via publica muntass ch'ins stuessi mantener ed asfaltar ella. La suprastanza communal ha dacuort tractau l'utilisaziun da quella via resp. senda e decidiu che il bus local astgi per exempel buca pli carrar sin quella via e stoppi ir entochen Zarcuns e naven da leu sil campadi. La via da fretg duei vegnir duvrada sulettamein per il puresser.

Il president communal sincerescha che la vischnaunca rugaleschi la senda pil puresser sche quei seigi giavischau.

Convischin 4 tema che la telecommunicaziun vegni ils proxims onns segir puspei a cavar si la via per lur projects. Il gerau dubeta che quei vegni ad esser il cass, mo el vegni a sclarir quei.

Convischin 5 exprima ch'ils gronds vehichels che fetschien diever dalla Via Milar hagien breigias da semenar el caraun che meini giu tier il campadi. Tenor el stuessen ins scumandar a manischaders da gronds vehichels da far diever dalla Via Milar.

Ina problematica seigi segiramein il sistem da navigaziun GPS. La suprastonza communal vegni a mirar co ei sappi vegnir evitau ch'ils vehichels da campar meinien giu el vitg da Rueras. Ei stoppi esser aschia che quels vehichels vegnien menai entochen Zarcuns e lu da leu engiu sil campadi. Era en quella caussa ei igl uffeci da baghegiar gia sedrizzaus alla polizia cantunala e tier igl uffeci da construcziun bassa dil cantun Grischun per mirar tgei pusseivladads ch'ei dessi. En tutta cass vegni ei a dar migliur.

Sco davos declara il president communal ch'ei seigi buca sempel da definir in perimeter tier sanaziuns da vias e che biars che hagien per exempel clavaus e baghetgs tier il campadi fetschien era diever dalla Via Milar per survegnir access tier lur parcelas. Ei seigi grev da reparter gestamein ils cuosts, mo ins hagi adina la pusseivladad da far protesta. Enzatgi stoppi pagar – u nossa generaziun ni la proxima. En mintga cass vegni la suprastonza communal a risguardar ils meinis e votums dils convischins e spera d'anflar ina buna repartiziun.

Votaziun

a) La radunonza da vischnaunca approbescha cun 22 vuschs gie ed 1 vusch na d'entrar en la tractaziun dalla fatschenta.

b) La radunonza da vischnaunca renviescha cun 16 vuschs na, 6 vuschs gie ed 1 abstenziun la proposta da metter crappa da sulada silla Via Milar.

c) La radunonza da vischnaunca approbescha il credit supplementar da frs. 313'000.00 per la sanaziun Via Milar (frs. 400'000.00 excl. frs. 87'000.00 per la sulada).

Tractanda 4 Orientaziuns

La geraua NG orientescha davart igl avegnir dall'alp da nuorsas. Ils davos onns hagi ei adina puspei dau incaps e problems cull'alp da nuorsas. Motivs seigien per exempel la difficultad d'anflar nursers capavels, las malsognas duront la stad, ils lufs, il provediment d'aua ni il

transport dils animals. Per quei motiv ha la suprastanza communal decidu da buca affittar l'alp da nuorsas entochen ch'ins anfli affittaders ch'ins sappi sefidar.

Gerau GM orientescha ils presents davart las lavurs da manteniment sin diversas vias communalas che vegnan ad esser terminadas culla fin da matg. Plinavon menziunescha el che la Via Prau Cumin vegni uonn buca rugalada sco quei ch'ei eri stau previu el preventiv. Il motiv ei che l'energia alpina vegni a baghegiar en la lingia d'electricidad da Sedrun Solar atras la Via Prau Cumin. La vischnaunca vegni a pagar all'energia alpina ils cuosts calculai ed aschia hagi lezza da sanar la via suenter las lavurs.

Tractanda 5 Varia

7 convischins prendan il plaid sut varia.

Convischin 6 sedamonda daco che la halla da deposit vegni pér baghegiada uonn e buca gia tschei onn, sco quei ch'ei eri planisau. Lu vul el saver sch'ils cuosts stettien en rama tier il project dalla casa resp. il local per giuventetgna.

Gerau GM declara ch'ins stetti culs cuosts tier la halla da deposit sut la calculaziun. Tier il local da giuventetgna cullas habitaziuns seigien ins culs cuosts sur la calculaziun. Leu stoppien ins ussa hanlegiar ni tut tenor adattar il project.

Convischin 7 havess bugen entginas informaziuns tier la Golden Card.

Il president declara ch'ei setracti d'ina carta per indigens cun differentas purschidas. Las vischnauncas da Mustér, Tujetsch, Andermatt, Realp e Hospental seigien en contractivas e sche tut mondi bein, lu vegni il pievel informaus ils 22 da matg davart la Golden Card. En gliez cass savess'ins acquistar la carta naven dils 28 da matg 2025.

Convischin 6 declara che la Via dil Bogn hagi pituu entras la sanaziun dil Bogn Sedrun. El vul saver sche quella via vegni rugalada.

Gerau GM sincerescha ch'ils parcadis vegnien fatgs niev. Entochen tier la Tges'Alva vegni ei rugalau tut cun agid d'ina summa limitada che seigi budgetada. Quei hagi da far nuot culla procedura da perimeter.

Convischin 1 fa menziun dallas novas sutgeras che vegnan baghegiadas en Val Val e dil project Sedrun Solar. Quei hagi per consequenza che la Via Milez vegni a pitir considerablamein il proxim temps. El vul saver tgei che vegni fatg en quei connex.

Gerau GM declara ch'ei vegni actualme in elavurau in concept da traffic per quella via. Ins vegni a mirar precautamein co quei mondi denter tuts utilisaders dalla via. La suprastanza communal seigi pertscharta dalla problematica ed ei vegni encuretg untgidas per saver risguardar tut ils pertuccai. Il president communal declara ch'ins stoppi, duront in temps e tenor basegns, forsa schizun serrar la via per ils civilists.

Convischin 8 queta ch'ins duessi schizun serrar la via per velocipedists - quei per motivs da segirtad.

Il president communal sincerescha che la suprastanza communal vegni ad intervegnir en cass ch'ei regi in caos silla Via da Milez.

Convischin 9 damonda sche la tonnascha sin quella via seigi definida. Uonn seigi la canalisaziun stada stuppada ed el vul saver sche quella problematica seigi ussa sliada.

Gerau GM pren il plaid e declara che la tonnascha silla Via Milez seigi limitada sin 11t. L'energia alpina e las pendicularas paghien mintgamai frs. 65.00 per tonna transportada silla Via Milez. Quellas entradas vegnien cudischadas en ina remessa e suenter las lavurs da Sedrun Solar vegni la via sanada.

Convischin 2 sedamonda daco ch'il Pass Alpsu vegni pér aviarts suenter Pastgas, schegie che la neiv seigi bunamein rumida dil tuttfatg.

Il president communal declara che l'energia alpina seigi pil mument vid baghegiar in indrez da schurmetg sur la via cantunala e sur la lingia dil tren. Fatg giu eri ei ch'il pass Alpsu sappi pér vegnir aviarts suenter quellas lavurs. Ussa fussien las lavurs terminadas ed ins savessi - tenor siu manegiar - arver il pass avon Pastgas. El vegni denton a prender si contact cun gl'uffeci da construcziun bassa dil cantun per mirar schebein ei fussi pusseivel d'arver il pass gia empau pli baul.

Il president communal engrazia a tuts presents per la participaziun, giavischa in bien retuorn a casa e siara la radunonza da vischnaunca allas 20.40 uras.

Protocollista:
Larissa Berther

President communal:
Martin Cavegn